



Progetu finantziatu cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018

## Franco Putzolu

Nàsciu in Serramanna in su 1936, Franco Putzolu iat incumentzau a traballai giòvunu meda in su 1953 imbiendi una figura befiana a su giornali ca bessiat dònna cida “Su Fùbbalu e su Tziclismu designau”. Calicunu, dd'at definiu in su tempus su “Forattini sardu”, e issu est stètiu de seguru un'artista canteapari de is designadoris befianus natzionalis comenti a Forattini, Vauro, Altan, Ellekappa, o internatzionalis comenti a s'argentinu Quino. Su fatu de essi nàsciu e bìviu in Sardigna at de seguru danneficau sa carriera professionali sua, impedendi a Putzolu de si fai connosci de unu pùblicu de su continenti.

Me in is annus '50 iat collaborau cun su giornali romanu ca bessiat dònna cida “Il Travaso delle idee” e apustis, si fiat trasferidu a Milanu, fiat stètiu pigau a traballai a sa Gama Film, de is fradis Gavioli, innui fadiat cartonis animaus publitzitarius po sa televisioni (is carosellus) donendi vida a personàgius devènnius famaus, comenti a sa famiglia de primitivus Babbut, Mammut e Figliut, capitanu Trinchetto e meda àterus. Iat traballau fintzas po “Il Travaso”, po “Il Delatore”, po “Bertoldo” e po sa ragorta de liburus “Questi Umoristi”.

A s'acabu de is annus sessanta, Putzolu fiat torrau in Sardigna e si fiat propostu a “S'Unioni Sarda”, intzandus dirìgia de Fabio Maria Crivelli. In su 1974 sa tira “Sardus Pater” (disegnada de Antonio Castàngia) fiat stètia acostada de sa de Putzolu denumenada “Sardus Filius”: custu giornaleddu permitiat a Putzolu de fai a biri una de is mellus armas suas de fogu e est a nai sa sàtira sotziali e de costùmini.

S'economista sardu nodidu, Paolo Savona, fueddendi de issu iat nau: «Putzolu est su prus fini e agudu osservadori e cumentadori de sa realidadi sòtziu-econòmica-culturali de sa Sardigna».

Cussu chi corfit, in prus de s'umorismu còmicu chi permitit a is disignus befianus de abarrai sèmpiri spassiosus, est sa capatzidadi de s'autori de amostai cun pagus tretus is situatzionis prus complessas; custa est una caraterìstica ca tenint sceti is grandu mastrus, una categoria innui si podit ponni de seguru Putzolu.

In su 2008 est premiau de su Comunu de Serramanna cun su "Serramannensis Gens": prèmiu bòfiu de s'aministratzioni comunali cun sa punna de donai riconoscimentu «a cuddus tzitadinus chi cun s'òpera issoru ant donau lustru a Serramanna».

Franco Putzolu est mortu, a s'edadi de 75 annus, su 3 de abrili de su 2011.